

Yi Lanz nienznomj vunz gyaeu-ndei, de dayoz bizyez le youq lwgcaen gending cungsim guhhong. Cienz mbouj suenq lai, gvaq ndaej bae, hong mbouj suenq nyaengq, dwg faenh hong cwxcaih ndeu, Yi Lanz gig muenxcuk hix gig gaenxguh.

“Dingling……” Soujgih yiengj hwnjdaeu, mbouj yungh yawj de hix rox dwg bouxyoux dwk daeu, diemj cung ndawde de gaenq dwk daeu sam baez lo. Yi Lanz mbouj vueng mbouj muengz mbon ok soujgih, caen dwg bouxyoux dwk daeu dahraix, de riunyumnyum, ndawsim cix ndaq naeuz: Duzfangz gip neix. Yi Lanz baez nyaenj soujgih, baihde couh dajciengj haibak:

“Vei, baujboiq, haeuxbyaek dingh ndei lo, mwngz caengz gvaq-daeu ha?”

“Lij miz ngeihcib faencung cij daengz seiz roengzban ne.”

“Mbouj dwg ngeihcib faencung ma, mizmaz gaenjau? Youh mbouj miz byawz gam mwngz, vaiqdi gvaq-daeu ba.”

“Yienznaeuz seizneix mbouj mizmaz hong guh lo, hoeng hix aeu cinjseiz hwnjban roengzban ya.”

“Caen dwg bouxvunz gaennyinz dog, duzvaiz lij rox ngengq gaeu bw, gvaqdaeu vaiq di, gwn sat haeuxcaeuz raeuz aeu……”

“Deq gonq……”

Ngamq ciep sat dienhvah, dahsau iq roek caet bi ndeu byaij haeu dou daeu, dahsau iq ndaeng sang bak saeq, gyaundeidei dwggyaez. De yiet gyaeu yawj neix neix yawj haenx, yaek gangj youh mbouj gangj.

“Dahsau iq, yaek daengz seiz roengzban lo, mwngz mizmaz saeh?”

“Gou……gou……gou yaek guh gending lwgcaen.”

“Gending lwgcaen?” Yi Lanz da daengx bak aj, yawj gij yiengh dah iq mbouj dwg gangjriu bw.

Raen Yi lanz doeksat, dah iq lienzmuengz naeuz: “Boh gou naeuz gou mbouj lumj de, de yaek caeuq meh gou lizvwnh.”

“Mbouj dwg bouxboux lwgnyez cungj maj ndaej lumj daxboh ne, miz mbangj lumj meh, miz mbangj lumj goengbuz, miz mbangj lumj dadaiq, gij yienghneix cungj gangj mbouj dingh.”

“Daxmeh gou hix yienghneix gangj, hoeng, daxboh gou cungj euq gij yienghde, itdingh aeu caeuq daxmeh lizvwnh, mwngz couh hawj



gou guh gending ba, gou yaek hawj daxboh yawjyawj gou dwg mbouj dwg lwgcaen de. yienghneix de couh mbouj caeuq daxmeh lizvwnh lo.”

Yi Lanz dingq le, mbouj rox vihmaz, ndawda hamzraemx cam: “Byawz heuh mwngz daeu neix?”

“Yawj densi rox.”

“Seizneix dwg seiz roengzban, mwh neix daxboh daxmeh ra mbouj raen mwngz couh simgaenj lo, mwngz baema ranz gonq, ndei lwi?”

“Mbouj! Gou yaek guh gending lwgcaen, gou hawj cienz hawj mwngz.” Gangj sat dahsau iq daj song aen daehbuh mbon ok song gaem ngaenz-soiq ndenq daengz dangqnaj Yi Lanz, “danghnaeuz mbouj gaeuq, gou heuh boh gou daeu hai cienz, de miz cienz lai.”

Mbaw siengq song conq ndeu cab

youq ndaw ngaenzsoiq, Yi Lanz geizheih dwk dawz daeu yawj, mbouj yawj couh suenq lo, baez yawj de bak ajloengqloengq: “Neix dwg byawz?”

“Dwg daxboh gou, mwngz naeuz gou lumj daxboh lwi?” Dahsau iq da yaepbyabbyab yawj Yi Lanz, muengh Yi Lanz naeuz de lumj daxboh de.

Seizneix, Yi Lanz saeknaj heurwdrwd, mbouj rox baenzlawz guh, cix ngaek gyaeu naeuz: “Lumj, mwmgz lumj daxboh, mwngz dwg lwgcaen daxboh mwngz.”

Dahsau iq baez dingq, angq dwk diuqyetyet, aennaj ronghrikrik lumj daengngoenz banringz nei, yaep ndeu, de cumh bak dwk naeuz: “Hoeng, daxboh mbouj saenq, gou lij aeu guh gending cij ndaej.”

Yi Lanz gig vaiq couh cingjleix ndei gij simcingz swhgeij, unqswnh

dwk doiq dahsau iq naeuz: “Dahnax miz yiengh doxgaiq ndeu, ndaej heuh daxboh mwngz nyinh daengz mwngz couh dwg lwgcaen de.”

Yi Lanz gangj sat, byaij haeu ndaw rug bae, dot aen goenhnyawh gwnz fwngz caeuq diuz soij gwnz hoz roengzdaeu, cang roengz aen hab’ iq gyaundeidei ndeu bae, suek le caengz youh caengz, ndenq hawj dahsau iq, nyinhcaen dwk naeuz: “Mwngz dawz aen hab neix gyau hawj daxboh mwngz, de yawj le couh rox mwngz dwg lwgcaen de lo, de hix mbouj caeuq meh mwngz lizvwnh lo. Aen hab neix dwg bouxsien hawj gou, cij ndaej hawj daxboh mwngz yawj, mbouj ndaej hawj daxmeh mwngz yawj, mboujnex de couh mbouj lingz lo.”

Dah iq hainduj mbouj saenq, raen Yi Lanz gangj ndaej gig nyinhcaen, de buenq saenq buenq mbouj saenq dwk dawz aen hab’ iq dauqbae lo.

Dahsau iq ngamq okdou, soujgih Yi Lanz youh yiengj lo. Yi Lanz baez yawj, aennaj de nyaeuq geij mbat, saeknaj bienq heuyau.

“Baujboiq, vihmaz caengz daeu ha? Gou siengj mwngz ne!”

“Baezlaeng mwngz gaej ra gou lo, mwngz caengz gietvaen bae gizlawz miz dahlwg haenx? Gij doxgaiq mwngz soengq gou haenx, gou gaenq gyau hawj dahlwg mwngz dawz dauqbae lo.” Yi Lanz gangj sat, sim de in lumj deng mid gvej nei, raemxda doek-byoebbyoeb.

## Dangj Lumj Aen Daengngoenz

### 党像红太阳

□Veiz Vwnzgauh/韦文高

Couh daezcang vwnzmingz  
Vwnzmingz bengz gvaq gim  
Raeuj ndawsim vunzraeuz

Ciuh doek ciuh goj gangj  
Daih dam daih goj cuenz  
Cien fanh bi mbouj duenh  
Vwnzmingz suenq baenz bauj

Boux bang boux cix ndei  
Boux gyaez boux cix baenz  
Vah ndei dangq gimngaenz  
Huzndei baenz ranzndeu

Mbwn namh seng fanh huq  
Caen fuk bu haeuj ranz  
Huzndei ndaej bingzan  
Cunghvaz fanh saeh hwngq

Roeg gyaez mbin giz sang  
Bya gyaez gyang haij youz  
Vunz gyaez maij swyouz  
Ndae yiengjsouh vaiqlag

Dauqcawq hai va rang  
Gizgiz angj va moq  
Swyouz fangzhwnz loq  
Neix goj angqvauvau (caengz sat)

## Veiz Gozcingh Sangcieng Cawj-guenj Guengjsae Ngeihcib Bi

### 韦国清上将主政广西二十年

□Hoz Saubangj sij Cinz Siengzcouh Liuz Gingliuj Cinz Siengzgen hoiz

Veiz Gozcingh mbouj ndaej gaemgienz gaenh baenz bi le, seizneix ndaej dauqcungz okdaeu gaemgienz dem, yienznaeuz de laemxsim yaek guh ndaej hong song baij, siucawz doxdingj, siengj caenhvaiq hawj gwnzbiengz ndaej onjdingh, mbefat swnghcanj, hoeng, aenvih gij loekloeng “swix” sonyinx “vwnzgwz” haenx caengz ndaej gajjbiengq, vanzlij gig hoj guh hong.

De baez ma daengz Namzningz cix ngoenz lienz haemh dwk caeuq gij vunz cujsaeq bwhguh wnq doengzcaez, cawjleix Guengjsae nauh “vwnzgwz” seiz gak cungj mauzdun fukcab haenx, daegbied aeu gajjgez song baij doxdingj gij vwndiz neix. De cawjleix vwndiz gij iugouz caeuq gij yenzcwz dwg, ciuq gij eiqsei cunghyangh song

baij haengjdingh cungj dwg cujciz vunzcingq gwzming, youj bingz vanj raemx ndeu.

Song baij cujciz, mboujlwnh dwg gij dingjrengz gvaq de haenx roxnaeuz dwg gij fanjdui gvaq de haenx, de cungj bae guh hong gyoengqde, coengzlaiz mbouj haemz gij saeh baedaeuq de gaxgonq haenx. Mbangj

bouxdaeuz cujciz vunzcingq guh genjdauj hawj de, naeuz doenghbaez baedaeuq de loek lo, de cungj dwg riuriu cix sat le, caemhcai q daj daengxbuenz Guengjsae bae naemj, haeujsim guh ndei gij hong swhsiengi gyoengqde.

De ciengzseiz caeuq gij dungzei gaemhong siujcuj bwhguh wnq bae

ciepraen gij bouxdaeuz song baij, heuh gyoengqde goq daengz buenz-hung, souj ndei hezyi, dingzsat hoenxdaeuq. Byawz souj ndei hezyi ne, couh haengjdingh caeuq biuj-yiengz; byawz guh loek ne, couh yiemzsuk bihbingz; byawz swhsiengi mbouj doeng nei, couh naihsim son-gyauq gangjufug de. (caengz sat)